


егемен Азатст

Жаһандық климаттың жаңа дәуірдегі сипаты



Адамзатты қоршаған орта туралы оннан аса іргелі кітап жазған, белгілі америкалық ғалым Билл МакКибеннің (Bill McKibben) бастасымен топтастырылған «Жер жаһанның қызыу жайлы баян» («The Global Warming Reader») атты заманауи жинақ алдымен 2011 жылы АҚШ-та содан соң араға бір жыл салып, Penguin Books баспалар жүйесі арқылы ағылшын тілді әлемнің оннан аса елдерінде жарық көрген-ді. Өз кезегінде бұл қөкейкесті туындыны жаһандық климаттың өзгеру себептері мен сол құбылыстың құллі биосфераға тигізіп отырған кері әсерін XIX ғасырдың соңғы жылдарынан бері қарай зерттеп-зерделеген айтулы эколог ғалымдар түйіндеген дәйекті де дәлелді тұжырымдарының ғана емес, сонымен қатар аталмыш құбылысқа қатысты пайымдалған саяси ой-пікірлер мен

көзқарастардың да антологиясы деуге лайық, өйткені жинаққа енген мақалалар топтамасы осы пікірдің дұрыстығына жөн сілтейді. Бұл орайда, ең алдымен, Билл МакКиббенге аталмыш жинақты құрастыруға түрткі болған негізгі себептерге тоқталған артық болмас.

Біріншіден, МакКиббенге 2011 жылдың мамыр айында АҚШ-тың оңтүстік аймағын ойрандап, жүздеген адамның өмірін жалмап кеткен алапат құйын-торнадолардың кейінгі кездерде тым жиілеп әрі күшейіп кетуі мен Техас штатында болған сұрапыл құргақшылықтың салдарынан туындаған алапат өрттің сол штаттың орасан аумағын шарпып кеткені де терең ой салған.

Екіншіден, әдетте 100 жылда бір-ақ рет арнасынан асып жайылатын Миссисипи өзені соңғы 20 жылдың ішінде қатарынан үш рет қатты тасыған.

Ушіншіден, әлем сарапшыларының пікірінше, 2010 жыл құллі ғаламшардағы ең ыстық жыл болып саналған болатын, себебі дәл сол жылы әлемнің 19 елінде ең жоғарғы аномалды температура тіркелген. Соның салдарынан Арктика мұздарының еру қарқыны да тым жылдамдаған. Дәл сол жылы болған алапат құргақшылықтың салдарынан егістік жерден алынатын өнімі күрт құлдырап кеткен Ресей өзге елдерге астық экспорттауды кілт тоқтатқан.

Ушіншіден, 2010 жылы Австралиядан бастап Пәкістан аралығына дейінгі мемлекеттердің бәрі дерлік сұрапыл су тасқындарынан зардап шеккен. Сондықтан да әлгі жылдың соңында әлемдегі ең іргелі сақтандырушы Munich Re компаниясы мынандай мәлімдеме жасаған: «Ауа райымен байланысты болып отырған алапат апattар санының тым жиілеп кетуінің бір ғана нақты себебі бар, ол – климаттың өзгеруі. Демек, ауа райының шектен тыс құбылуы мен сол құбылыстың жиілеуі жер жаһаның қызу үдерісімен тікелей байланысты деген пікірдің бұлтартпайтын негізі бар. Өйткені бұл бүгінгі ғылым мен білім негізdemelerімен де сәйкес келеді».

Төртіншіден, аталмыш жинақты жарыққа шығаруға Билл МакКиббенді итермелеген негізгі себептердің және бірі төмендегідей: ғылыми қауымдастықтар мен сақтандырушы компаниялар, сондай-ақ АҚШ-тың Қоршаған ортаны қорғау агенттігі де қоса дабыл қағып, мемлекеттің қауіпсіздігіне төніп тұрған ең үлкен қатердің климатологиялық катаклизмдермен тікелей байланысты екенін және бұл құбылыстың түп-тамыры адамзаттың өз іс-әрекетінен туындалған жатқанын еске сала отырып, аталған сын-қатерлердің алдын алуға бағытталған арнайы заң қабылдау керектігін АҚШ Конгресінің назарына жеткізген болатын. Алайда Конгресс тиісті заң қабылдауға ықылас білдіргенімен, шешім қабылдауға келгенде депутаттардың 184-і ғана аталмыш заң жобасын қолдап дауыс берді. Ал 240 депутат, яғни Конгрестің басым көпшілігі қарсы шығып, маңызды заңды қабылдатпай тастанған болатын.

Жинаққа топтастырылған мақалаларды Билл МакКиббеннің аса ыждағаттылықпен іріктең алғып, үш бөлімге жіктең орналастырғаны көрініп тұр. Жинақтың бірінші бөлімі хронологиялық тұрғыдан бір ғасырдың ішінде жарық көрген ғылыми мақалаларды қамтыса, екінші бөлімі әлемдік экологиялық мәні зор мәселелердің түпкілікті шешілмеуінің саяси астарын ашатын материалдарға арналған, ал үшінші бөлімі климатологиялық катаклизмдердің әлемдік салдарын сипаттайтын мақалалар тобын құрайды.

Жинақ аса дарынды швед ғалымы, математик әрі 1903 жылды химия саласы бойынша Нобель сыйлығымен марараптталған Сванте Аппхениустің (Svante Arrhenius) «Атмосфераға көмірқышқыл газының топырақ температурасына тигізетін әсері» деген мақаласымен басталады. Айтса айтқандай-ақ, Сванте Аппхениус 1896 жылдың өзінде-ақ таскемір жанғанда бөлініп шығатын улы газдың көлемі атмосферада тым көбейіп кететін болса, бірте-бірте бұл үдеріс Жер қызының 5 немесе 6 градусқа дейін көтеретін болады деген көкейге қонымды болжам жасаған. Бір ғажабы ғалымның әлгі пайымын Жер қызының бақылайтын бүгінгі заманың суперкомпьютерлері де растайтыны жасырын емес. Сосын, Сванте Аппхениустің әлгі пікірі жинақтың бірінші бөліміне енген өзге ғалымдар мен айтулы ғылыми орталықтардың тарапынан да қолдау тапқан. Олардың ішінде

Англияның эйгілі ғалымы G.S. Callendar, әлемге белгілі америкалық климатолог әрі АҚШ-тың NASA ғылыми орталығына қарасты іргелі ғылыми зерттеу институтының басшысы James Hansen, БҰҰ-ның аясында 1995 жылы құрылған Климатологтардың үкіметаралық жұмысшы тобы, Калифорниядағы мұхиттарды зерттейтін ғылыми-зерттеу институтының қызметкерлері Roger Revelle мен Hans E.Suess, сонымен қатар 2000 жылы химия саласы бойынша Нобель сыйлығын алған Paul J.Crutzen мен оның әріптесі Eugene F.Stoemer сынды айтулы ғалымдар бар.

Жинақтың екінші бөлімі атағы әлемге әйгілі саясаткер, АҚШ-тың 45-вице-президенті әрі Нобель сыйлығының лауреаты Альберт Гордың 1992 жылы жарық көрген «Earth in the Balance» («Таразыға түскен Жер») атты іргелі туындысынан алғынған үзіндімен басталатыны жайдан-жай емес. Өйткені, шынтуайтқа келгенде, Альберт Гор – жаһандық климаттың өзгеруі мен құллі әлемде жиі-жиі қайталанып жатқан алапат климатологиялық катаклизмдердің түп-тамыры адамзат өркениетінің өзінде жатқанын, демек, атмосфераның улы газдармен шектен тыс ластануына кінәлі адамзаттың өзі ғана екенін жасырмай, сол шындықты ту етіп көтерген бірінші саяси тұлға. Бұлай деуге толық негіз бар. Өйткені Альберт Гор өзінің заманауи саяси көзқарастарын «Қолайсыз шындық» және «Болашақ» атты нақты дәйектер мен шынайы дереккөздерге негізделген ғылыми-экологиялық туындылармен де дәлелдеп шықкан болатын.

Дәл сол 1992 жылы Рио-де-Жанейрода БҰҰ-ның «Қоршаған орта және даму» атты тақырыптың аясында өткізген конференциясынан кейін климатология ғылымы жандана түсіп, енді нақты істерге көшу мәселесі құн тәртібіне қойыла бастаған болатын. Оның үстінен Альберт Гордың вице-президенттің кезінде атмосфераға көмірқышқыл газы секілді улы қалдықтарды ең көп тарататын мемлекеттердің көшбасында АҚШ, одан кейін Қытай, Ресей және Үндістан тұрған-ды. Сондықтан да улы қалдықтарды жоюға немесе барынша азайтуға бағытталған нақты іс-әрекеттердің дәл Вашингтоннан басталуы әлем үшін үлгі ретінде өте маңызды еді. Бірақ, өкінішке қарай, АҚШ Конгресі әлгі көкейкесті бастаманы колдаудың орнына жұмған аузын ашпай, мұлде үнсіз қалды.

Солай солай болғанмен, аталған үнсіздіктің жымысқы сырын Boston Globe газетінің репортері Ross Gelbspan айқара ашып берген болатын. Бұл орайда, әсіреле, журналистің «The Heat is On» («Ыстық төніп тұр») атты туындысынан алғынған әрі біздер тілге тиек етіп отырған жинаққа енген үзіндінің мәні өте зор. Өйткені журналистік терең зерттеулер жүргізудің нәтижесінде Ross Gelbspan көмір, мұнай, газ секілді жер қойнауынан өндірілетін биосфераға аса зиянды энергетика көздеріне иелік етіп отырған қалталы монополистердің жымысқы айла-тәсілдерінің бетпердесін сипырып, әлемдік қоғамдастықтың назарына батыл ұсынған. Мәселен, қоршаған ортаны шектен тыс ластап қана қоймай, климатологиялық катаклизмдерге тікелей ұрындырып отырған монополистік индустріяның иелері өздеріне шаң жуытпас үшін қаржысы мол қор құрып алып, бұқаралық ақпарат құралдарының өкілдерін сатып алудан да тайынбайтынын, тек ол ғана емес, климатология ғылымы ашып отырған ашы саясаткер ғалымдардың жанайқайын тұншықтырып тастау үшін қараниет әрекеттердің бәріне де баратынын паш етеді әрі олардың қулық-сұмдықтарының бүге-шігесіне дейін жайып салады.

Дәл осы тұста жинаққа енген ғылыми климатологиялық сараптамалардың кейбір қорытындыларын оқырман назарына ұсынған артық болмас. Олар төмендегідей:

1995 жылдан бергі уақытта Жер қызыуының көтерілуінің салдарынан Арктика жазғы мұз қыртысының 25 процентінен айырылған;

Гренландия мұздағы да үлкен жылдамдықпен еріп келеді;

Гидрологиялық цикл түбегейлі бұзылғандықтан, алапат құрғақшылықтар мен сұрапыл нөсерлер де тым жиілеп барады;

Атмосфераға тараған көмірқышқыл газын сініріп алатындықтан, мұхиттар мен теңіздердің химиялық құрамы өзгеріп, күн өткен сайын олардың қышқылдануы еселең есуде;

Орман өрттері бұрын болмаған жылдамдықпен етек алып, тіпті субарктикалық аймақтардағы мәңгі жасыл ормандарды да құрт-құмырсқалар жалмап жатыр. Әдетте қысы қатты жылдарда мұндай құбылыс мулде байқалмайтын;

Астық өнімдерінің көлемі тұрақсызданып, кейбір аймақтарда егін алқаптарын ыстық ұрып, жаппай жалмап жатыр;

Маса тарататын аурулар, атап айтқанда, денге деп аталатын безгектің бір түрі бүгінде Солтүстік Америкаға дейін жетіп үлгерді;

Су тапшылығы, құрғақшылық және өзге себептермен атақоныстарын тастан шыққан босқындар легімен байланысты туындаған қорқыныш саяси қақтығыстарға ұласып, кейбір елдердің шекарасына зәулім дуалдар тұрғызыла бастады;

Теніз деңгейінің көтерілуінің салдарынан алса аралдардың тұрғындары тұрақтарын тастан кетуге мәжбүр болып жатыр.

Жинаққа енген мәтіндерден тағы да байқап отырғанымыздай, 1997 жылы Жапонияның Киото қаласында өткен жаһандық климат өзгерістеріне арналған бүкіл-әлемдік конференцияға АҚШ-тың атынан вице-президент Альберт Гор қатысып, әлгі форумның мінберінен алдағы жылдары АҚШ таратынан атмосфераға таралатын көмірқышқыл газының мөлшерін 35 пайызға қысқартатынын мәлімдеп қана қоймай, конференция қабылдаған Киото хаттамасына АҚШ-тың атынан қол қойған болатын. Өкінішке қарай, президент Билл Клинтон мен Альберт Гор биліктен кеткеннен кейін АҚШ-тың жаңа президенті мен Конгресс аталмыш хаттаманы ратификациялаудан да, Киотода күллі әлемнің алдында қабылдаған міндеттемелерінен де бас тартқан болатын.

Дәл осындағы қисынсыз қылыш АҚШ таратынан 2015 жылы әлемдік климат жөнінде Парижде өткен бүкіләлемдік конференциядан кейін де айна-қатесіз қайталанды. Париж хаттамасына АҚШ президенті Барак Обама қол қойып міндеттеме алғанымен, одан кейін билік тізгінің ұстаған президент Дональд Трамп 2017 жылы ол келісімнен бас тартып, әлемдік мәні бар халықаралық құжатты АҚШ тағы да ратификацияламай тастанады. Өкінішті-ақ!

Дей тұрғанмен, әлемдік қоғамдастықтың алпауыты екі мәрте серттен тайып кетсе де, өзге мемлекеттердің басым көпшілігі, олардың ішінде Қазақстан да бар, қоршаған ортаға қатысты Киото мен Париж конференцияларында қабылданған жаһандық мәні бар шешімдерді орындауға өз үлестерін қосып келеді. Демек, Bill McKibben жарыққа шығарған жинақтың әлемдік қоғамдастық назарына ілігіп, онда көтерілген жаһандық мәні бар мәселелердің адамзат санасын оята бастағанына дау жок. Бұл пікірдің бір дәлелі ретінде Бельгия, Австрия, Португалия, Дания, Финляндия және Ұлыбритания сынды мемлекеттердің көмірден бас тартуға бет алғанын айтуга болады. Сонымен қатар осыдан біраз күн бұрын ғана Германияның көмір өндіретін ең соңғы шахтасын жапқанын да құптарлық қадам деп қабылдаған жөн. Алайда осы айтылғандарға қарап, әлемдік климатқа қатысты түйткілдер біржолата шешілді деуге әлі ертерек екені айтпаса да түсінікті. Өйткені бүгінгі таңда жасыл энергетикалық балама көздерге көшу қарқын ала бастағанына қарамастан, электр энергиясын өндіруде көмірдің әлемдік үлесі әлі күнге дейін орта есеппен алғанда 70 пайызды құрап отыр, ал оза дамыған кейбір алпауыт мемлекеттердің өзінде бұл көрсеткіш әлі күнге дейін 80 пайызға жетеді. Бұл әрине, кімді болса да ойландыратын мәселе. Демек, таза ауа, таза су, таза топырақ, таза биосфера, таза сана және таза пигыл үшін курес болашақта да жалғаса бермек.

Әділ АХМЕТОВ

Қазақстанның еңбек сінірген қайраткері, Халықаралық жоғары мектеп ғылым
академиясының академигі